



BARAZA LA WAWAKILISHI – ZANZIBAR

ORODHA WA SHUGHULI ZA LEO

BARAZA LA TISA LA WAWAKILISHI

MKUTANO WA NNE

Kikao cha Tatu – Tarehe 25 Novemba, 2016.

Kikao Kitaanza Saa 3.00 (Tatu) Asubuhi
na Dua zitasomwa.

I. MASWALI:

Ofisi ya Makamu wa Pili wa Rais:

140. MHESHIMIWA YUSSUF HASSAN IDDI (Jimbo la Fuoni) -
Atamuuliza Mheshimiwa Waziri wa Nchi, Ofisi ya Makamu wa
Pili wa Rais:

Serikali kwa nia njema inajenga kituo maalum cha kurekebisha
tabia vijana walioathirika na Dawa za kulevya katika eneo la
Kidimni Wilaya ya Kati.

- (a) Je, ni kiasi gani mpaka sasa kishatumika katika ujenzi
huo.
- (b) Ni lini kituo hicho kitakamilika.

Ofisi ya Rais, Katiba, Sheria, Utumishi wa Umma na Utawala Bora:

126. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Nchi, Ofisi ya Rais, Katiba, Sheria, Utumishi wa Umma na Utawala Bora:

Zanzibar ina wafanyakazi wachache wa Serikali ukilinganisha na wafanyakazi wa Serikali ya Jamhuri ya Muungano. Wafanyakazi hawa wakifanya kazi kwa pamoja, wafanyakazi wa Serikali ya Zanzibar na ile ya Jamhuri ya Muungano hupelekea Wafanyakazi wanaotoka Serikali ya Mapinduzi ya Zanzibar huona kuna uonevu fulani, kwa kuwa kuna tofauti kubwa ya mishahara ambapo kwa wafanyakazi wa SMZ maslahi yao ni madogo sana.

- (a) Je, Serikali haioni umuhimu wa kupandisha kima cha chini cha mishahara angalau uendane na ule wa wenzao.
- (b) Je, ni tatizo gani ambalo linafanya mishahara ya Wafanyakazi wa Zanzibar ikawa midogo sana.
- (c) Je, lini Serikali itaweza kufikia lengo hilo la kupandisha mishahara ili kwenda na kasi ya kupanda kwa gharama za maisha.

Ofisi ya Rais, Tawala za Mikoa, Serikali za Mitaa na Idara Maalum za SMZ:

88. MHESHIMIWA ZAINA ABDALLA SALUM (Nafasi za Wanawake) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Kama tunavyojuwa kwamba mfanyakazi yeyote anapochukuwa masomo ya Elimu ya Juu (*degree*) ili kuongeza ujuzi wa kazi yake, hulipiwa masomo hayo na Serikali kwa kupitia Wizara au Idara yake anayoifanyia kazi.

Kuna Askari wa Idara Maalum za SMZ ambao wamechukuwa masomo ya elimu ya juu, (*Degree*). Kwa mfano Chuo cha Mafunzo wanajilipia wenyewe kupitia mishahara yao kitu ambacho mishahara hiyo haikidhi mahitaji ya familia zao na gharama za masomo hayo.

- (a) Je Mheshimiwa Waziri haoni kwamba utaratibu huo unawavunja moyo askari hawa wa kuitumikia nchi yao kwa uaminifu na mapenzi makubwa.
- (b) Je Serikali kupitia Wizara yake inawafikiria vipi askari hawa kuwapatia fedha hizo ili wakalipe madeni yao ya chuoni.
- (c) Serikali kupitia Wizara yake ni lini hasa fedha hizi zitakabidhiwa kwa askari hawa wanaosoma ili kuondosha usumbufu baina yao na wakuu wao wa kazi.

156. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Nchi, Ofisi ya Rais, Tawala za Mikoa, Serikali za Mitaa na Idara Maalum za SMZ:

Serikali imekua katika mpango kabambe wa kuendeleza eneo la Darajani (Darajani Coridor) na hatua zimeshaanza kuchukuliwa. Kumekuwa na taarifa kuwa katika uendelezaji huo, Skuli mbili kongwe za Darajani na Vikokotoni zitabomolewa kwa ajili ya kupisha ujenzi wa maduka makubwa ya biashara (malls). Kwa kuwa nchi nyingi hujenga maduka makubwa ya Biashara nje ya mji hasa katika miji mipya ili kutanua fursa za biashara na maendeleo ya miji mfano Dar es Salaam maduka hayo yamejengwa Mlimani City, aidha Mji wa Dubai wamejenga nje ya Mji.

- (a) Je, taarifa za kuondolewa skuli hizo kongwe na muhimu nchini ni za kweli.
- (b) Kama ni za kweli kwanini Skuli hizo kongwe zibomolewe kwa ajili ya ujenzi wa maduka ya Biashara ambayo yanaweza kujengwa pahala pengine nje ya Mji, kipi kina thamani kubwa kati ya elimu na maduka ya biashara. Serikali imepima vipi hasara na faida ya kuzibomowa skuli hizo, pamoja na ujenzi wa maduka hayo hasa ukizingatia kuwa Skuli hizo zinapunguza masafa ya kufata elimu kwa vijana wetu, aidha ujenzi wa maduka hayo makubwa unazingatiaje miundo mbinu ya Mji Mkongwe, Msongamano wa gari, uwepo wa maegesho ya kutosha na hadhi ya Mji Mkongwe.

Wizara ya Habari, Utalii, Utamaduni na Michezo.

97. MHESHIMIWA ALI KHAMIS BAKAR (Jimbo la Tumbe) - Atamuuliza Mheshimiwa Waziri wa Habari, Utalii, Utamaduni na Michezo:

Serikali kwa kuthamini uchumi na kuimarisha utalii imeona kuimarisha sekta ya Utalii, hivyo kuna majengo ya makumbusho ya kale Chwaka Tumbe (Msikiti Chooko) na Mkamandume Pujini Kisiwani Pemba yametupwa, maeneo haya yakiimarishwa yanaweza kuingiza fedha kupitia sekta ya utalii na kuyafanya majengo haya yatambulikane rasmi.

- (a) Je, Wizara ina mpango gani wa kuyaimarisha makumbusho yale ili wananchi wasiendelee kuyaharibu na kuyafungia wanyama.
- (b) Anadhani ni kwa vipi wananchi wa Jimbo la Tumbe watafaidika na ajira pale endapo makumbusho yatafanyakazi.

153. MHESHIMIWA TATU MOHAMED USSI (Nafasi za Wanawake) - Atamuuliza Mheshimiwa Waziri wa Habari, Utalii, Utamaduni na Michezo:

Sekta ya Utalii inaaminika kwamba ni moja kati ya sekta muhimu zinazochangia kwa kiasi kikubwa katika uchumi wa nchi yetu pamoja na kutoa ajira kwa vijana wetu.

- (a) Vijana wangapi wameajiriwa katika sekta hii ya utalii na kwa kiasi gani imepunguza wimbi la vijana wasiokuwa na ajira.
- (b) Ni kwa kiasi gani Sera ya Utalii kwa wote imetekelezwa tangu kuanzishwa kwake.

Wizara ya Ardhi, Maji, Nishati na Mazingira:

47. MHESHIMIWA OMAR SEIF ABEID (Jimbo la Konde) - Atamuuliza Mheshimiwa Waziri wa Ardhi, Maji, Nishati na Mazingira.

Kwa kuwa Mhe. Rais na Mwenyekiti wa Baraza la Mapinduzi katika hotuba yake ya uzinduzi wa Baraza hili alitoa ahadi ya kutengeneza chuo cha Amali katika eneo la Ungi Msuka. Hata hivyo, eneo lililopangwa kujengwa chuo hicho cha amali kuna skuli ya msingi ya Ungi ambayo ina compyuta ambazo hazitumiki kutokana na ukosefu wa nishati ya umeme. Aidha Dr. Amani Abeid Karume mwaka mmoja kabla ya kustaafu kwake alitoa ahadi ya kutia umeme katika skuli hiyo.

Je, ujenzi wa chuo cha amali katika eneo hilo utazingatia ukamilishwaji wa ahadi ya Rais mstaafu wa awamu ya sita wa kutia umeme katika skuli hiyo ili kuweka mazingira mazuri ya ufaulu kwa wanafunzi wanaosoma skulini hapo kwa lengo la kuwaandaa kujiunga na chuo hicho kipya cha amali kinachotarajiwa kujengwa hivi karibuni.

50. MHESHIMIWA SULEIMAN SARAHAAN SAID (Jimbo la Chake Chake) - Atamuuliza Mheshimiwa Waziri wa Ardhi, Maji, Nishati na Mazingira.

Serikali inafanya juhudi kubwa ya kuwasogezea huduma ya umeme wananchi lakini baadhi ya sehemu hautumiki kabisa na pengine kupata hasara.

Je, Serikali haioni umuhimu wa kuhamasisha wananchi kutumia umeme zaidi ili ataetumia umeme mwingi apunguziwe na kupewa punguzo kwa utumiaji huo.

54. MHESHIMIWA SULEIMAN SARAHAAN SAID (Jimbo la Chake Chake) - Atamuuliza Mheshimiwa Waziri wa Ardhi, Maji, Nishati na Mazingira.

Katika eneo la ufukwe wa Tibirinzi zamani maeneo hayo yalikuwa yakitumiwa na wazee na vijana kwa kujipumzishia na kuogelea, sasa maeneo hayo yamefukiwa na mikoko na mji wa Chake Chake ni Mji wa Pili kwa Zanzibar na hauna sehemu nyengine ya kupumzikia na kuogelea.

Je, Serikali haioni umuhimu wa kuwa na sehemu kama hiyo katika mji huo wa Chake Chake.

Wizara ya Ujenzi, Mawasiliano na Usafirishaji:

64. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Ujenzi, Mawasiliano na Usafirishaji

Ndege zinazotoa huduma ya usafiri kwa abiria zimetakiwa kuwa na Rubani (2). Na kwa kuwa Zanzibar inaruhusu kutoa huduma za usafiri wa anga kwa ndege zenye Rubani mmoja jambo ambalo ni hatari kiusalama na kinyume na Sheria za Anga za Kimataifa.

- (a) Je, kwanini nchi nyengine zimeweza kusimamia Sheria hizo kwa mfano India, Canada n.k. na kwanini Zanzibar tunashindwa.
- (b) Je, kwa vile kuna kama kesi (3) zimewahi kutokea Rubani akiwa angani na kuugua mfano uwanja wa Mbeya, Iringa na Mwanza, kwanini Tanzania hatutaki kujifundisha kutokana na matokeo hayo
- (c) Kwa kuwa watu wenye bima kubwa ya maisha hawaruhusiwi kupanda ndege yenye rubani mmoja na Kampuni za Ndege zinaheshimu wateja kama hao wanapokodi ndege zao kwanini wengine wanufaike na Sheria na wengine wasinufaike wakati wananchi wote wanahaki sawa mbele ya sheria kwa mujibu wa Katiba ya Zanzibar.

71. MHESHIMIWA JAKU HASHIM AYOUB (Jimbo la Paje) - Atamuuliza Mheshimiwa Waziri wa Ujenzi, Mawasiliano na Usafirishaji

Hivi karibuni iliripotiwa na vyombo mbali mbali vya habari Zanzibar ikiwemo Gazeti la Zanzibar Leo la tarehe 28/7/2016 kuwa Mhe. Waziri wa Ujenzi, Mawasiliano na Usafirishaji amefanya uteuzi wa Wajumbe wa Bodi ya Usajili Wasanifu, Wahandisi na Wakadiriaji majengo. Jumla ya Wajumbe walioteuliwa ni sita.

- a) Je, uteuzi huo umezingatia vipi masharti ya Sheria ya Wajenzi, Wahandisi na Wakadiriaji majengo No. 5 ya 2008, kuhusu sifa za Wajumbe wa Bodi hiyo.
- b) Miongoni mwa Wajumbe walioteuliwa ni wataalamu katika fani za majengo na uhandisi, Je, Waziri amezingatia vipi kumbukumbu za utendaji za wajumbe hao kabla ya kuteuliwa.

72. MHESHIMIWA SULEIMAN SARAHAN SAID (Jimbo la Chake Chake) - Atamuuliza Mheshimiwa Waziri wa Ujenzi, Mawasiliano na Usafirishaji

Serikali ya Mapinduzi ya Zanzibar inajitahidi kutafuta vyanzo vipya vya mapato na kuongeza jitihada za ziada za kukusanya mapato na pia kujitangaza zaidi katika ulimwengu huu wa kibiashara.

Je, Serikali imejipangaje kuanzisha Shirika la Ndege la Zanzibar.

Zanzibar,
25 Novemba, 2016.

(Amour M. Amour)
KNY. KATIBU WA BARAZA.